




ԱՍՏՎԱԾԱՇՈՒՆՉ ՄԱՏՅԱՆԻՑ

ՍԱՂՄՈՍ Ա

- 1.—Երանելի է այն մարդը,
որ չհետևեց ամբարիշտների խորհրդին
և չգնաց մեղավորների ճանապարհով
և չնստեց չարականների աթոռին:
- 2.—Այլ, նրա կամքը Տիրոջ օրենքներն են
և նրա օրենքների մասին է խորհում քիչեր ու ցերեկ
- 3.—և նա ջրի հոսանքի մոտ տնկված ծառի է նման,
որ իր պտուղը ժամանակին կտա
և նրա տերևը չի թափվի
և ամեն ինչ որ կկատարի,
կհաջողվի նրան:
- 4.—Բայց այդպես չեն ամբարիշտները,
ո՛չ, այլ նման են փռշու, որ քշում է քամին
և ցրիվ տալիս երկրի վրա:
- 5.—Դրա համար ամբարիշտները
չեն կանգնելու դատաստանի առաջ,
ոչ էլ մեղավորները՝ արդարների խորհրդում,
- 6.—որովհետև Տերը ճանաչում է
արդարների ճանապարհը,
բայց ամբարիշտների ճանապարհները կկորչեն:

ՍԱՂՄՈՍ Բ

- 1.—Հեթանոսները ինչո՞ւ խոսվեցին
և ժողովուրդները խորհեցին ընդունայն,
- 2.—երկրի թագավորները խորհրդի ելան
և իշխանները հավաքվեցին ժողովի
Տիրոջ և իր Օծյալի դեմ:

- 3.—«—Խզե՛նք նրանց կապանքները
և թոթափենք նրանց լուծը մեզանից»:
- 4.—Երկնքում բնակվողը ծիծաղելու է նրանց վրա
և Տերը արհամարհելու է նրանց:
- 5.—Այն ժամանակ նա խոսելու է նրանց հետ
իր բարկությանը
և խոովեցնելու է նրանց
իր սրտմտությանը:
- 6.—«—Ես թագավոր կարգվեցի նրա կողմից՝
Նրա Սիոն սուրբ Լեռան վրա,
հռչակելու համար հրամանները Տիրոջ»:
- 7.—Տերն ասաց ինձ.
«—Դո՛ւ ես իմ որդին
և ես այսօր ծնեցի քեզ.
- 8.—Խնդրիր ինձանից
և քեզ հեթանոսներին ժառանգություն կտամ,
և իշխանություն՝ երկրի բոլոր կողմերում:
- 9.—Պիտի հովվես նրանց երկաթյա գավազանով,
որպես բրուտի անոթ պիտի փշրես նրանց»:
- 10.—Ա՛րդ, ո՛վ թագավորներ, խոհեմացե՛ք,
և դո՛ւք, երկրի դատավորներ, խրատվեցե՛ք,
- 11.—երկյուղով ծառայեցե՛ք Տիրոջը
և դողալով ցնծացե՛ք նրա առաջ,
- 12.—ընդունեցե՛ք նրա խրատը,
որպեսզի Տերը չբարկանա
և դուք չկորչեք
արդարության ճանապարհներից,
որովհետև նրա բարկությունը
այն ժամանակ զարհուրելի կլինի:
- 13.—Երանի՛ նրանց, ովքեր իրենց հույսը
Տիրոջ վրան են դրել:

ՍԱՂՄՈՍ Գ

- 1.—Սաղմոս Դավթի
- 2.—Տե՛ր, որքա՛ն շատացան ինձ նեղողները
և շատերը իմ դեմ ելան:
- 3.—Ծառերն իմ մասին ասացին,
թե՛ սրա համար չկա՛ փրկություն իր Աստծո մոտ.
- 4.—բայց դո՛ւ, ո՛վ Տեր, իմ օգնականն ես,
իմ փառքն ես և գլուխս բարձր պահողը:
- 5.—Ես աղոթեցի Տիրոջն իմ ձայնով
և նա լսե՛ց ինձ իր սուրբ լեռից:
- 6.—Ես պառկեցի և քնեցի,
արթնացա, և Տերը իմ պահապանն է.
- 7.—ես չեմ վախենա նրանց բյուրավոր զորքերից,
որոնք շուրջս բոլորած՝ պաշարել են ինձ:

8.—Արի՛, Տեր, և փրկի՛ր ինձ, ո՛վ իմ Աստված,
որովհետև դու հարվածեցիր բոլորին,
ովքեր թշնամի էին ինձ առանց պատճառի,
և մեղավորների ատամները կփշրես:

9.—Տիրոջից է փրկությունը.
Քո օրհնությունը
թո՛ղ քո ժողովրդի վրա լինի:

Թարգմ.՝ Ա. Ե.

